

ZAKON O UPOTREBI GRBA I ZASTAVE UNSKO-SANSKOG KANTONA

I OSNOVNE ODREDBE

Član 1.

Ovim zakonom uređuje se upotreba grba i zastave Unsko-sanskog kantona (u daljem tekstu: Kanton).

Član 2.

Grbom i zastavom Kantona predstavlja se Kanton i izražava pripadnost Kantonu.

Član 3.

Grb i zastava Kantona upotrebljavaju se u skladu s odredbama ovog zakona na način kojim se ističe ugled i dostojanstvo Kantona.

Član 4.

Isticanje grba i zastave Kantona s grbom i zastavom Federacije Bosne i Hercegovine i s grbom i sa zastavom Bosne i Hercegovine vrši se u skladu s ovim zakonom i posebnim propisom.

Član 5.

Grb i zastava Kantona mogu se upotrebljavati samo u obliku i sadržaju utvrđenim Zakonom o grbu i zastavi Unsko-sanskog kantona.

U grbu i zastavi Kantona ne može se ništa mijenjati.

Izuzetno, ako je to posebnim propisima utvrđeno, grb i zastava Kantona mogu se upotrijebiti kao sastavni dio drugih obilježja (vojne, komandne i rangovne zastave i dr.).

Član 6.

Originali grba i zastave Kantona čuvaju se kod predsjednika Kantona i prema njima se oblikuju grb i zastava Kantona.

Član 7.

Grb i zastava Kantona ne mogu se upotrijebiti kao robni ili uslužni žig, uzorak ili model, niti bilo koji drugi znak za obilježavanje robe ili usluga.

Izuzetno, grb i zastava Kantona mogu se upotrijebiti u svrhe iz stava 1. ovog člana po posebnom odobrenju Kantonalnog ministarstva pravde, na način i po postupku utvrđenim posebnim propisom, koji donosi kantonalni ministar pravde.

Propis iz stava 2. ovog člana kantonalni ministar pravde će donijeti u roku od 60 dana od dana stupanja na snagu ovog zakona.

Član 8.

Upotreba grba i zastave Kantona slobodna je u umjetničkom stvaralaštvu ili odgojno-nastavnoj svrsi, pod uvjetom da se time ne vrijeđa ugled i dostojanstvo Kantona.

Član 9.

Grb i zastava Kantona ne mogu se upotrebljavati na javnom mjestu ako su oštećeni ili svojim izgledom neprimjereni za upotrebu.

Oštećeni ili za upotrebu neprimjereni grb i zastava povlače se iz upotrebe.

Član 10.

Ako se grb i zastava Kantona ističu na području Kantona zajedno s drugim domaćim ili stranim grbom, odnosno zastavom istog ili nižeg ranga, grb, odnosno zastava Kantona, stavlja se na počasno mjesto, u skladu sa ovim zakonom, osim u slučaju iz člana 4. ovog zakona.

II UPOTREBA GRBA KANTONA

Član 11.

Grb Kantona upotrebljava se:

1. u sastavu pečata Kantona, u skladu sa Zakonom o pečatu Unsko-sanskog kantona,
2. u službenim prostorijama i natpisima na zgradama gdje su smješteni organi Kantona i općinski organi na području Kantona;

3. u objektima kojima se obilježava granica Bosne i Hercegovine na dijelu područja Kantona kojim se proteže granica, prema posebnim propisima;
4. na uniformama pripadnika Kantonalnog ministarstva unutrašnjih poslova;
5. u drugim slučajevima u skladu sa zakonom.

Član 12.

Grb Kantona može se upotrebljavati:

1. na zgradama u kojima su smještene jedinice, ustanove, komande i štabovi Vojske Federacije Bosne i Hercegovine na području Kantona i u svečanim prostorijama tih zgrada;
2. prilikom međunarodnih susreta, takmičenja i drugih skupova (političkih, naučnih, kulturno-umjetničkih, sportskih i dr.) na kojima Kanton učestvuje ili je reprezentiran u skladu s pravilima i praksom održavanja takvih skupova;
3. na službenim pozivnicama, čestitkama i sličnim aktima koje koristi predsjednik Kantona, predsjedavajući Skupštine Kantona, predsjednik Vlade Kantona, ministri i drugi funkcioneri Kantona;
4. u drugim slučajevima, ako njegova upotreba nije u suprotnosti s odredbama ovog zakona.

Član 13.

Ako se grb Kantona ističe na području Kantona zajedno s grbom Bosne i Hercegovine i s grbom Federacije Bosne i Hercegovine, grb Bosne i Hercegovine nalazi se u sredini, grb Federacije Bosne i Hercegovine s lijeve strane, a grb Kantona s desne strane, sprijeda gledano.

Ako se grb Kantona ističe na području Kantona zajedno s jednim ili više domaćih ili stranih grbova ili drugim sličnim amblemima istog ili nižeg ranga, grb Kantona nalazi se na počasnom mjestu:

1. u sredini kruga, sprijeda gledano, ako su druga obilježja poredana u krug;
2. u sredini polukruga, sprijeda gledano, ako su druga obilježja poredana u polukrug;
3. na čelu kolone drugih obilježja, ako su obilježja poredana u koloni;
4. na čelu grupe drugih obilježja, ako su obilježja poredana u grupe;
5. na desnoj strani, sprijeda gledano, od grba strane države ili međunarodne organizacije koja se ističe u centru, osim u slučajevima službenih posjeta državnih ili međunarodnih organizacija kada se upotrebe vrše u skladu s propisom iz člana 4. ovog zakona.

III UPOTREBA ZASTAVE KANTONA

Član 14.

Zastava Kantona ističe se:

1. na zgradi u kojoj su smješteni Skupština Kantona, predsjednik Kantona i Vlada Kantona;
2. na zgradama u kojima su smješteni općinski organi na području Kantona za vrijeme svečanosti u tim gradovima, odnosno općinama;
3. uz zastavu Federacije Bosne i Hercegovine u dane praznika na zgradama u kojima su smješteni organi Kantona, za vrijeme trajanja praznika;
4. na prijevoznim sredstvima koja koristi predsjednik Kantona;
5. u dane žalosti koje odredi Vlada Kantona, na pola koplja za vrijeme trajanja žalosti;
6. u drugim slučajevima pod uvjetima i na način utvrđen zakonom.

Član 15.

Zastava Kantona može se isticati:

1. na zgradama u kojima su smještene jedinice, ustanove, komande i štabovi Vojske Federacije na području Kantona, za vrijeme svečanosti u tim jedinicama, ustanovama, komandama i štabovima;
2. prilikom međunarodnih susreta, takmičenja i drugih skupova (političkih, naučnih, kulturno-umjetničkih,

sportskih i dr.) na kojima Kanton učestvuje ili je reprezentiran, u skladu s pravilima i praksom održavanja tih skupova;

3. prilikom proslave, svečanosti i drugih masovnih političkih, kulturnih, sportskih i sličnih manifestacija koje su od značaja za Kanton;
4. u drugim slučajevima, ako njena upotreba nije u suprotnosti s odredbama ovog zakona.

Član 16.

Ako se zastava Kantona ističe na području Kantona zajedno s drugim zastavama, osim zastave Bosne i Hercegovine i zastave Federacije Bosne i Hercegovine, zastava Kantona nalazi se na počasnom mjestu:

1. u sredini kruga, sprijeda gledano, ako su zastave poredane u krug;
2. u sredini polukruga, sprijeda gledano, ako su druge zastave poredane u polukrug;
3. na čelu kolone drugih zastava, ako su zastave poredane u koloni,
4. na prvom mjestu u vrsti, sprijeda gledano, ako su zastave poredane u vrstu,
5. na čelu grupe, ako su zastave poredane u grupe.

Ako se zastava Kantona ističe pored zastave Bosne i Hercegovine i zastave Federacije Bosne i Hercegovine, zastava Bosne i Hercegovine nalazi se u sredini, zastava Federacije Bosne i Hercegovine s lijeve strane, a zastava Kantona s desne strane, sprijeda gledano.

Član 17.

Ako se zastava Kantona ističe preko ulice ili trga, na stolu bini ili nekom drugom počasnom mjestu u vertikalnom položaju, položaj zastave treba da bude takav da se plavo polje nalazi na desnoj strani.

IV KAZNE NE ODREDBE

Član 18.

Novčanom kaznom u iznosu od 1.500 do 7.500 KM kaznit će se za prekršaj preduzeće ili druga pravna osoba, ako:

1. upotrijebi grb ili zastavu Kantona u obliku i sadržaju suprotno odredbama člana 5. ovog zakona;
2. upotrijebi grb ili zastavu Kantona kao znak za obilježavanje robe ili usluga (član 7.);
3. upotrijebi grb ili zastavu Kantona suprotno uvjetima iz člana 8. ovog zakona;
4. ako na javnom mjestu upotrijebi grb ili zastavu Kantona koji su oštećeni ili su svojim izgledom nepodobni za upotrebu (član 9.);
5. ako upotrijebi, odnosno istakne grb ili zastavu Kantona suprotno odredbama člana 4., 12. i 15. ovog zakona;
6. ako ne upotrijebi, odnosno ne istakne grb i zastavu Kantona u skladu s odredbama člana 10. i 13. ovog zakona.

Za prekršaj iz stava 1. ovog člana kaznit će se i odgovorna osoba u preduzeću, organu vlasti ili drugoj pravnoj osobi novčanom kaznom u iznosu od 300 do 750 KM.

Član 19.

Za prekršaj iz člana 18. stav 1. ovog zakona novčanom kaznom od 300 do 750 KM kaznit će se osoba koja samostalno obavlja privrednu djelatnost.

Za prekršaj iz člana 18. stav 1. tač. 1., 2., 3. i 4. ovog zakona kaznit će se građanin novčanom kaznom u iznosu od 100 do 400 KM.

Član 20.

Učiniocu prekršaja iz člana 18. i 19. ovog zakona može se izreći i zaštitna mjera oduzimanja predmeta kojim je izvršen prekršaj.

Ovlašteno lice Kantonalnog ministarstva unutrašnjih poslova može prije podnošenja zahtjeva za pokretanje prekršajnog postupka oduzeti predmete iz stava 1. ovog člana i odmah predati nadležnom organu.

V ZAVRŠNA ODREDBA

Član 21.

Ovaj zakon stupa na snagu narednog dana od dana objavljivanja u "Službenom glasniku Unsko-sanskog kantona".

Broj: 01-1-234/00
31. maja 2000. god.
B i h a ć

Predsjedavajući Skupštine
Unsko-sanskog kantona
Adem Borić

315.

Na osnovu člana 5 (1) C, odjeljak B. poglavlja V Ustava Unsko-sanskog kantona, donosim

ODLUKU

O PROGLAŠENJU ZAKONA O IZMJENAMA I DOPUNAMA ZAKONA O VLADI UNSKO-SANSKOG KANTONA

Proglašava se Zakon o izmjenama i dopunama Zakona o Vladi Unsko-sanskog kantona, koji je na prijedlog Vlade Unsko-sanskog kantona, donijela Skupština Unsko-sanskog kantona, na 20. sjednici održanoj 6. jula 2000. godine.

Broj: 02-150/10/00
27. jula 2000. god.
B i h a ć

Predsjednik
Unsko-sanskog kantona
mr. Muhamed Beganović

ZAKON

O IZMJENAMA I DOPUNAMA ZAKONA O VLADI UNSKO-SANSKOG KANTONA

Član 1.

U Zakonu o Vladi Unsko-sanskog kantona ("Sl. list Unsko-sanskog kantona", broj 2/97. i "Sl. glasnik Unsko-sanskog kantona" br. 3/00.) u članu 2. dodaje se novi stav koji glasi: "Ministri su za svoj rad odgovorni i predsjedniku Vlade."

Član 2.

U članu 6. briše se stav 2., a stav 3. postaje stav 2.

Član 3.

Član 10. mijenja se i glasi:

Zamjenik predsjednika Vlade odgovoran je za:

- pomaganje predsjedniku Vlade u provođenju politike i izvršavanju kantonalnih propisa;
 - obavljanje dužnosti predsjednika Vlade, kada predsjednik nije u mogućnosti vršiti svoju dužnost ili kada je mjesto predsjednika Vlade upražnjeno, dok novi predsjednik ne preuzme dužnost;
 - obavljanje drugih poslova utvrđenih Ustavom Kantona.
- Predsjednik Vlade, u okviru svojih ovlaštenja, može pojedina ovlaštenja prenijeti na zamjenika predsjednika Vlade.

Član 4.

Ovaj zakon stupa na snagu narednog dana od dana objavljivanja u "Službenom glasniku Unsko-sanskog kantona".

Broj: 01-1-243/00
6. jula 2000. god.
B i h a ć

Predsjedavajući Skupštine
Unsko-sanskog kantona
Adem Borić